



Sujet 2008: LIESCHTEL PUR DANK VERPACKIGS-KULTUR !!!

Schlitzauge-Tourischte uffem yypackte
Uussichtsduurm

Eis vo öisne Woorzeiche, der Uussichtsduurm uffem Schleifebärg obe, isch alt und gebrechlich, me channen nümme lobe. Er bruucht e Totalsanierig. Bis ufs Yyse abe muess me alli Farbschichte abeschlyffe, d Mooler ghörsch singe und pfyffe.

Wills aber nit numme alti sondern au no giftigi Farbe het und joo kei Schlyffstaub in d Luft use set, hetme öise Duurm müesse yypacke vo obe bis unde, und das hei mir ganz doll gfunde, öise Duurm eso verpackt und wyt umme sichtbar, das muess me gsee ha, das isch doch klar.

Ei Daag sy mir wie immer uffe Duurm uufe gloffe, s isch fascht nit zum Glaube, was mir dört hei aadroffe. E Reisegruppe mit Schlitzauge isch umme Duurm umme grennt und us allne Lage hei si öisi „neui Kunscht“ mit vill Knipse digital in iire Linse brennt.

Das het öis denn drzue bewooge, öis z überlegge was me in Lieschtel süscht no alles chönnti verpacke und als „neui Kunscht“ verchaufe, so dass au im Stedtli wiider Tourischte ummelaufe.

Der „Törliplatz“ isch doch au so öppis wo me chönnt verpacke und verstecke. Dä Platz würdi sicher niemer vermisse, wills en nämmlig no gar nie gee het, alles andere isch bschisse. Aber me müsesti der Plakat-Felix und d Frau Maag au no drinyne binde, dass me se nüm so schnäll würd finde.

Au öises Döörli chönnt me emol yypacke, aber uf kei Fall lo verschwinde süscht würd me jo der Yygang ins Stedtli nümme finde. E schöne neue Aastrych würds allewyl verdräge und sicher mit sym Glöggli dankschön säge.

D Seestroos und der Kasinowäg die cha me nümme lo verschwinde inere Schublade zhinderscht hinde. Nei do wird jetz bout, mit Volldampf wird grabe und gschuuflet und wiider yygfüllt und verdichtet, so wirts au im Gmeiblättli brichtet.

Jetz hoffe mir, asme denn d Seestroos wiider mit 30 cha befaare statt mit zwanzig, by däm langsame Gestotter wird mir nämmlig immer der Butter ranzig.

Bym Kasinowäg do si mir nonig sicher und löie öis lo Überrasche, mir warte druff bis sich s erscht mool zwee bym Chrütze döie tuschiere und denn wuetentbrannt uf öisi Bouverwaltig aabe marschiere.

So jetz wei mir eus aber au nit verstecke, mir gönge ab in d Gasse vo Lieschtel als Schlitzauge-Tourischte und hoffe mir bechömmen au do no öppis in öisi Fotochishte. Öich allne wünsche mir vill Spass und gniesset die schöne Dääg, denn sy mir für d „EURO 08“ zwääg.

Wie allewyl isch am Fasnechtszyschdig d Ladäärne-Uusstellig in der Roothuusstrooss vom Zwöi zmidag bis am Nüüni zoobe!